

Ч. 44. (79.)

Крыница, четверг дня 21. листопада (8.) 1935.

Рок II.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котрі не ввели ще пренумерату, просимо вирівняти якнайскорше рахунки.

Також просимо прислати членські вкладки до Лемко-Союзу.

Кто хоче достати ілюстрований **Календар „Лемка”** на 1936-ой рок, нехай прислат якнайскорше гроші.

Ціна одного календаря виносить **50 гр.** При замовленнях 10 календарів покриває редакція оплату поштовою.

Для облегчення в пересылці грошей за календары и пренумераты высылат ся в приложенію чеки П. К. О.

Рада Министров ухвалила господарчи декреты.

В звязи с прийнятєм закона о полномочиях, Рада Министров ухвалила дня 9. т. м. пят проектов декретов Президента Річипосполитой, котры дають початок акції приведення до рівноваги державный бюджет и оживлення господарчого життя в краю.

Перший с тых проектов обнимат обнижку урядничих пенсий от 1. грудня 1935 р. Пенсии до 100 зл. місячно не будут обнижены. Але уж пенсии,

от 101 зл. до 150 будут обнижены о 7 проц.

„ 150 „ „ 200 „ „ „ 9 „
„ 200 „ „ 250 „ „ „ 10 „
„ 250 „ „ 500 „ „ „ 11 „
„ 500 „ „ 1000 „ „ „ 14 „
„ 1000 „ „ 2000 „ „ „ 17 „
Повыше 2000 зл. „ „ „ 20 „

Не будут обнижены инвалидскы ренты, пенсии ветеранов народных повстань и вдов по них, пенсии бывших политичных узников, пенсии, привязаны до ордера „Virtuti Militari“, отзнакы „Krzyża Zasługi za dzielność“, пенсии людей, особенно заслуженых и ренты асекурацийны работников фазычных.

Другый декрет обнимат обнижку коморного, а третій обнижку податка от льокалей.

Четвертый декрет стремит до отодолженя Повітових Выділов.

Для селян однак найважнійший єст декрет пятый, котрый бесідує о отодолженю рольных господарств и стремит до умягчення трудного положеня на селі. Рада Министров признала додатковий кредит в бюджеті Минист. Рольництва в цілі несеня помочи селянству, потерпівшому от ріжних бід.

Выдаваны декреты, особенно тоты, котры будут относити ся до села, буде ся оговарювати в слідующих числах Лемка.

Проект амнестийного закона.

Министерство правосудия приготвило уж проект закона о амнестии для преступников политичных и криминальных. Проект предвиджує дарованє кары за преступленя политичны до 1½ року и поменшенє кары до половины, если вымір ей обнимат от 1½ року до 3-ох літ вязницы.

Для справ криминальных буде подарована кара до 6-х місяцов и поменшена до половины высша кара.

Амнестия буде оголошена в грудні.

От нового року подешевіє желізница.

Правительство, стремячи до пониження коштов удержаня, рішило обнижити желізнодорожну тарыфу особову и тягарову.

Новы тарыфы мають быти введены от нового року. Нова тарыфа особова має быти передовсем сильно обнижена на пространстві до 200 км.

Тарыфа товарова предвиджує значну обнижку за перевоз рольных продуктов, товаров суровых и полфабрычных.

ЦИ ЗАМОВИЛИ ВЫ УЖ
КАЛЕНДАР ЛЕМКА
НА 1936 РОК?
ЕСЛИ НІ, ТО ЗРОБТЕ ТОТО,
ЯК НАЙКОРШЕ!
КАЛЕНДАР КОШТУЄ ЛЕМ ВСЬОГО
50 грошей.

В ділі курсов в Крынице.

Як уж в попередных числах „Лемка” подано, має ся урядити в Крыниці Селі 2 зимушны курсы:

1) **курс дырыгентов хорів**

и

2) **курс ткацкий.**

Оба тоты курсы сут потребны и користны и выкликали початково велике заинтересованє. Єст килька зголошень на письмі и много зголошень устных, а также дуже запытань.

В виду того, же уж дня

1. грудня

має ся начати наука на тых курсах, просимо всіх, котры хотят взяти участь в курсах, прислати зголошенє на писмі.

Пригадуєме, же так на курс дырыгентов, як и на курс ткацкий, могут быти приняты хлопцы и дівчата. Користайте с нагоды и вписуйте ся якнайчисленнійше на курсы!

С фронту войны ита- лиянско-абисынской.

В минувшом тыждні начали италиянскы войска офензиву на всіх трох фронтах и zdobyли пару важных позиций.

На фронті полночном

zдобыли италияны по кырвавых боях місто Макалє. Сильны віділы италиянскы вошли до міста с трох сторон. Не застали там ани одного абисынского вояка.

Опанованє міста Макалє оплатили италияны тяжкыма стратами. На пару дней перед опанованєм міста, вирушил в ночи до міста віділ италиянский, зложеный с перешло 1000 вояков. Комендантом віділа

был полковник Ансальдо, маючи до помочи кильканадцетох офицеров. В місті не за-стали абисынских войск, а населенє приняло их торжественно. Не надіючи ся нічого злого, войско розложило ся на головной площі. В яке полгодини напали на них с трох сторон абисынскы войска и в пень вирізали. Лем невеликой горсточці удало ся утечи, решта была або вирізана, або достала ся до неволі.

На фронті полудневом опановали италянскы войска абисынску кріпость Горагаи. Опанованє той твердыні дає италянам ключ до пустині Огаден и открыват дорогу, ведучу до Гарару. Тото опанованє єст доказом рішительной перевагы италянской техники над слабо вооруженом абисынском арміом, котра самолетам и танкам може противставити лем машинны карабины и погорду смерти своих вояков.

По тых побідах италяны машеруют в глущину Абисинии на всіх трох фронтах.



Руска Бурса в Горлицах.

В неділю, дня 27.X. отбыло ся обще собрание членов О-ва „Руска Бурса в Горлицах“ под председательством д-ра Я. Сьокалы.

С отчета о діяльности оказало ся, што бурса розвиват ся шторааз то лучше. Свідчит о том передовсем число воспитанников, котре с тамтогорочного 21 зросло в том році на 35. С тым 15 ходит до гимназии, 18 до школы народной, а 2 учит ся приватно. Минувшего року ученики рекрутовали ся лем с повіта горлицкого, а тепер

єст с леского—2, кроснянского—3, ясельского—1 и сандецкого—3, а решта с горлицкого.

Приход бursы за 1934/35 р. шк. выносит 6.259.59 зл. На суму тоту зложили ся: оплата учеников 46.0 зл., самообложене місячне интеллигенции 520 зл., аренда поля 263 зл., членскы взносы 189 зл. решта сплата долгов бурсі и пожертвованя. Росход выносил суму 6.157.64 зл. На предложене г. Т. Войтовича, председателя контрольной комиссии, ствердившого, што ціле діловодство, книги и квиты найдены в полном порядке, уділено абсолюторию и признательность уступающему выдѣлову.

До нового выдѣла выбрано: председателем д-ра Ярослава Сьокало с Горлиц, заст. предсід. и касиром г. Николая Юрковского с Сквирного, секретарем г. Теодосия Ядловского со Смерковца и членами выдѣла: г. Теодора Войтовича с Устя Руского, г. Романа Максимовича с Горлиц, г. Льва Желема с Мацины и Константина Бодака с Роздѣля; заступн. членов выдѣла: Дмитрия Златиканича с Смерковца и Михала Желена с Мацины Вел.

До контрольной комиссии вошли: Василь Малецкий, Дамян Будняк и Емилян Федорчак.

Присутный.



Плеканє озимин.

Помимо того, же под зиму заумерат ціла природа и всі рослины, аджек и озимины, перестают расти, то однак в дакотрых случаях, штобы не змарніти, потребуют озимины помочи господара.

Наилучше зимуют озимины, если земля замерзнет на кость, а пак упадут снігы. В таком случае господар може быти певный, же озимина выйде на весну красна. Сніг єст злым проводником теплоты и тому озимина под сніговым покрывом зимует знаменито и не боит ся хоцбы и як сильных морозов. Планыше єст, коли зима єст безснїжна и морозна, бо втотчас могут пропасти засівы, особенно поздны.

Также недобре єст, если сніг упаде на незамерзнену землю. Если єст тепло, то сніг стає и не зробіт шкоды озимині. Але, коли на незамерзнену землю упадут великы снігы и аж пак хопит мороз, то помимо низкой температуры, земля под снігом може быти незамерзнена и творит ся болото, рослины живут и с недостатка воздуха дышат ся. Втотчас озимины могут совсем пропасти.

Господары уж отдавна думали, як обезпечити ся от такой біды и придумали простый, але добрый способ. До середно грубого друка 1½ м. долгого, вбивае по выверченую дыр в отступах 40 центиметровых сильны зубы, долготы 40 до 50 см. в зависимости от того, як груба єст верства снігу. До друка приправляе дышликы на одного коня, котрого запрягае и робиме зубами борозды, сягаючи аж до самой землі. Тым способом робиме доступ для зимного воздуха и земля замерзат в пару годинах, вздержючи вегетацию озимин. Озимина находит ся в стані зимущного сну и недостаток воздуха не може ей пошкодити. Єст то способ простый, а приряд до того може зробити собі сам господар.

Арт. 11.

Діяльність и компетенция Правленя:

1) Правленє выполнят ухвалы Общого Собрания, 2) администрує маєтком и фундациями Союза, 3) Предкладат Общому Собранию рочны билансы, 4) здає отчет Общому собранию со своей рочной діяльности, 5) дійствує во всіх напрямх руского национального житя на Лемковщині и то в напрямі культурально-просвітном и економично-господарчом. 6) В звязи с тым: а) редагує и выдає через выбранный медже собом комитет редакцийный и при помочи фахового редактора свой орган. Крім того обовязанный єст каждый член Правленя в міру своих сил и таланта писати и поміщати в органі артыкулы в ціли обогащения его содержания, б) выдає и закупує книжки содержания религиозного, исторического, економического и господарчого, в) основує библиотеку при своих отділах административных, удержує и веде головну библиотеку при центральном отділі, а то в ціли заосмотрения читальнь, драматических кружков и других осередков национального и культурального житя в отвітну литературу, г) основує читальні им. М. Качковского, касы, кооперативы и гимнастичны союзы. При читальнях основує драматичны кружки, хоры, оркестры, курсы лекций языка руского, истории, а также отчиты с области кооперации и рольного господарства. д) стремится до основания и удержания школ, бурс, курсов промысловых, огородовых и с области других галузей рольного господарства. е) стремится до утворения и удержания центрального банка для цілой Лемковщины. ж) скликає штонайменьше раз в році повітове обще собрание членов Союза в ціли обговорения діл арт. 2. обнятых. з) устроює торжества державны, народны и о характері льокальном и стремится до того, штобы в каждом селі отбывали ся собрания о програмі обнятой арт. 2. и) стремится до приидняния якнайбольшого числа членов Союза.

Арт. 12.

В ціли выполнения наложенных на правленє обовязков, вычисленных в попередном артыкулі одержує Правленє до своей распорядимости органы административны.

Арт. 13.

Органы административны и их склад:

1) Головный Отділ административный, при котром должна

містити ся редакция и администрация Союза. 2) Дочерны отділы административны по повітовых містах 3) делегаты-администраторы по меньших містах и селах.

Арт. 14.

Центральны Отділ административный:

В склад его входят: два урядники административны и секретар Правленя. Урядники административны мусят быти обовязково членами Союза. Один с них провадит діл национальный и культурно-просвітный (школы, бursы, читальні, драматичны кружки, гимнастичны союзы, хоры, оркестры), другой веде діл економический, финансовый и господарчий (касы, кооперативы, молочарні и курсы кооперативны). Оба административны урядники принимают участие в редагованю газеты через помещанє в ней отвітных артыкулов, относячих ся до их ділов.

Головна задача административных урядников єст познати ся со станом річи на місцах своего района на цілой Лемковщині, приготовленє терена до діяльности культурно-просвітной и економической. При основаню выше наведеных культурно-просвітных и економических осередков должны присутствовать члены місцевого Правленя, а то по крайней мірі один. Дальшим их обовязком єст удержати в основанных осередках правильную діяльність через основанє драматических кружков, хоров, оркестр, устраиванє отчетов с области истории, економии и рольного господарства, а также стало контроловать діяльність тых осередков. Со своей діяльности и о результатах контролі, а также о стані річей на місци, о потребах основания новых осередков списуют административны урядники, каждый в области своей діяльности рапорт периода двохнедельного. Рапорты тоты секретар Правленя предкладат місцевому Правленю перед засіданєм. На засіданю місцевого Правленя могут явити ся запрошены через місцеве Правленє административны урядники в ціли даня пояснень, або отобрания инструкций от місцевого Правленя.

До их компетенции належит также выбор и предложене Правленю до затвердження делегатов-администраторов.

Представлены нима особы місцевому Правленю, яко кандидаты на делегатов-администраторов сут приняты місцевым Правленєм провизорично, а дефинитивне их затвердження отбыват ся аж на найблизшем пленарном засіданю Правленя.

(Продолженє на ст. 3-ой).

Назагал не треба судити, же в зимі засіви не вимагають ниякой опеки. Ниоборот, так в выше описаном случаю, як и инших (н. пр. при скором таяню снігу, коли под водом може также озимина выгинути) мусит господар все слідити, штобы через недосмотр не запропастити цілорочный труд.



В ділі асекурации.

Як уж писали мы в попередних числах „Лемка“, заключил Лемко Союз договор с асекурационным Т-вом „Вита и Краковске“, в силу котрого асекурацийне Т-во „Вита и Краковске“ платит Лемко-Союзу процент от всіх полис, які выставлено посредством Лемко-Союза. Як додідуєме ся с пересланого нам Т-вом „Вита и Краковске“ выказа, не всі заасекурованы выкупили полисы и многы залягають с уплатом першой раты.

Поминаючи приход для Лемко-Союза, котрый однак также не можна легковажити, бо договор єст того рода, же при добром розвитку акции, можеме дойти до власного асекурацийного товариства, што поднесло бы сильно економичне положенє на Лемковщині,—мусиме однак звернути увагу тым всім, котры полис не выкупили, же не можеме поняти их поведєня. Медже нима фигурують люды поважны, занимаючи видны положєня, котры розуміють добре, же за оглядины лікарскы Т-во платит, в виду чого не повинни были ити до лікара, не маючи охоты заасекуровати ся. Оправданє, же их ктоси нагварил до того, не выдержує крытыкы, бо сут то люды уже не першой молодости, маючи свой розум и здаючи собі

справу с того, же люды поважны мусят поносити консенквенции своих поступков, если не хотят ся осмішити. Знаючи людей, выказанных нам Т-вом „Вита и Краковске“, не віриме, штобы они напавду не хотіли выкупити полис, а скорше допускаєме, што прислано им полису в том часі, коли у них под руком не было грошей и тому звертаєме ся до них (на разі безименно) с просьбом зажадати в асекур. Т-ві поновного прислання полисы и ю выкупити.

Звертаєме ся также и до тых, котры ище з ріжних причин не заасекуровали ся, штобы зробили тото якнайскорше. Передовсем зробят тото для власной користи, бо тым способом обезпечают собі спокойну старость, а кромі того причиняют ся до економичного поднесєня Лемковщины.



ЖЕРТВЫ ЗЛОЖЕНЫ НА РУСКУ БУРСУ В НОВОМ САНЧІ.

Як відомо, о маєток Руской Бурсы в Новом Санчі веде ся уж от 11-ох літ процес с зарядом міста Новый-Санч. Процес тот переходил ріжны фазы, раз выгравали мы, другой раз місто Новый Санч, а все сут потребны гроши на стемплі и другы судовы и адвокатскы оплаты.

Дня 27. жолтня т. р. на бщом Собраню членов Руской Бурсы в Новом Санчі, отбытом в Крыниці, члены бурсы рішили самообложити ся на тоту ціль и до тепер зложили жертвы: Мет. Трохановский 10 зл., Игор Трохановский 10 зл., Ирина Трохановска 5 зл., Влад. Гойняк 1 зл. Емил.

Яновицка 2 зл., Надежда Копыстьянска 2 зл., Мария Король 2 зл., Стефанида Дуркот 2 зл., Чит. им. Качковского в Лабові 20 зл., Дрожджак Конрад 2 зл., Осиф Вислоцкий 2 зл., Савва Мончак 1 зл., Гриц Висиоцкий 1 зл., Томко Пелячик 1 зл., Семан Кулянда 1 зл., Констант. Кулянда 1 зл., Петро Кулянда 1 зл., Осиф Кулянда 1 зл., Мария Олесневич 1 зл., Тимко Калиняк 1 зл., Ваньо Калиняк 1 зл., Читальня им. Качков. в Матієві 10 зл., Ваньо Даньчак 1 зл., Чит. Качк. Нова-Весь 5 зл., Максим Стефанко 2 зл., Павел Кузма 1 зл., Никиф. Масыра 1 зл., Чит. Качк. Богуша 5 зл., Коопер. „Прогрес“ Богуша 5 зл., Чит. Качк. Королева Руска 5 зл., Кооп. „Прогрес“ Корол. Руска 5 зл., Чит. Качк. Крыница 10 зл., Кооп. „Прогрес“ Крыница 10 зл., Ропицкий Алекс. 2 зл., Павел Вислоцкий 1 зл., Александер Поглид 2 зл., Тома Живицкий 5 зл., Михаил Слезин 1 зл., Влад. Данилков 5 зл., Чит. Качк. Андреевка 10 зл., Антоний Станчак 5 зл., Васко Петрик 2 зл., Антон Кусик 2 зл., Мелетий Тихий 1 зл. — Разом 164 зл.

Кромі того зложили жертвы на руки г-не Алексия Милянича и О. Романа Прислопского, котрых спис помістит ся в слідуячом числі.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“

Секретар при центральном отділі администратийном провадит реєстр всіх членов Союза, а каждого місяца списує, а взглядно удержує стало спис місцевых членов в цілі собраня місячных вкладок, котры должны были собраны найдальше до 10-ого каждого місяца. Секретар центрального отділа администратийного выдає поручєня секретарам других отділов администратийных и секретарам-делегатам в предметі списаня выказов місцевых членов Союза и собраня місячных вкладок. Місячны вклады должны были ульюкованы в касах отділов, а по уплаті коштов администрации и зарезервованю певной суммы на текучи выдаткы надмір льокує ся на щадничу книжечку Союза в Товаристві Кредытном „Бескид“ в Сяноці. Книжечку вкладкову с точным выказом приходов и росходов отдає секретар председателю, або єго заступнику при місци пребывания Союза. Секретар веде кореспонденцию, отберат писма, доглядат библиотеку, выпожичат книжки читальням и другим осередкам культурально-просвітным, а также поодынокым членам Союза.

Секретар списує с важнійших событь, с протоколов Общого Собраня, с протоколов засідань Правленя и с рапортов администраторов літопись, котру переховує в актах Союза.

Арт. 15.

Дочерны отділы администратийны:

Склад отділов дочерных єст анальогичный, як отділа центрального, с том однак ріжнищом, же в зависимости от місцевых отношєнь в змыслі материяльном и персональном в склад дочерного отділа може входити двох урядников администратийных, с котрых оден занимат ся ділами культурально-просвітными и економично господарчима, а другой, помагаючи першому в той діяльности, полнит также функции секретара отділа, або с одного члена, взглядно урядника административного, однак в том случаю функции секретара отділа полнит обовязково оден с членов місцевого Правленя. Дальши ріжницы медже центральным и дочерными отділами сут тоты, што діяльність дочерного отділа ограничат ся лем до єго рейона, а также, што урядники администратийны кромі двохнедільных рапортов, складаных своєму місцевому Правленю, обовязаны сут высылати місячны рапорты до центрального отділа в цілі удержаня точной евиденции о діяльности Союза.

Понадто секретар дочерных отділов администратийных по собраню місячных вкладок в данной місцевости, а также по заинкасованю вкладок собраных через секретарей делегатов в єго рейоні, по уплаті коштов администрации и по оставленю какойсй суммы на текучи выдаткы, отсылат решту грошей с точным выказом доходов и розходов на руки секретара при центральном отділі. Выказ доходов и росходов должны подписати обовязково: секретар отділа и двох членов місцевого Правленя.

Арт. 16

Делегаты администраторы:

Выбраны и затверждены в попередном артыкулі маюť подобну компетенцию, як урядники администраторы с том ріжнищом, што діяльність их ограничат ся, взглядно относит ся до місца их пребывания. Делегаты-администраторы сут помочниками отділов администратийных.

До них, яко місцевых належит точне познакомленє ся со станом річей на місци и уділянє информации своєму отділові. Дальшом задачом єст приготавленє отвітного росположеня духа у місцевого населєня для начатя діяльности культурально-просвітной и економичной.

По основаню осередка культурально-просвітного або економичного обовязком делегатов-администраторов буде поддерживать діяльність тых осередков.

О каждой потребі маюť обовязок и право звертати ся безотложно до своих администратийных отділов.

В цілі сталого информованя своих отділов администратийных о стані річей на місци, обовязаны сут делегаты-администраторы выготовляти каждого місяца рапорты и пересылати их на руки секретара отділа через секретара місцевого делегата.

Секретар-делегат єст обовязаный [собраны] вклады отослати в цілости своєму отділу [администратийному, причом має предложити выказ належных до уплаты сум.

В той цілі одержує от секретара отділа потребны суммы, а также дробну квоту на покритє текучих выдатков.

Секретары-делегаты сут обовязаны пересылати свои рахункы с подписами особ, котрым належны гроши маюť быти уплачены, рахунок тот понадто должны подписати всі три делегаты-администраторы.

(Продолженє в слід. числі.)

Што чути в світі.

Москва: По случаю 18-ой рочницы советской революции отбыла ся 7. т. м. ревия войск, а пак великий поход дефилювал на Червеной Площі перед сильными С.С.С.Р. В часі той дефиляды тягарове авто в послідстві дефекта в'їхало в толпу работников и во-яков и убило 6 особ а 10 ранено. Шофера Пецухина арестовано.

Москва: Доносят с Москвы, же ціны с'їстных припасов от тамтого року подешевіли. Ціны мяса и рыжу упали о 3500., масла, омасты, колбас и хліба о 5000., цукру и 6500.

Париж: В Парижі видано приказ, же всі дома мают мати схованки противлетничи. До тепер єст там уж 27.256 схованок, могучих помістити 1,761.530 людей.

Париж: В послідних часах замічат ся штораз больши непорозумленя медже Франциом и Малом Ентентом. Занята Лявальом позиція в ділі конфликта абисинского, в котром он боронит Италию, не подабат ся ани в Празі и Білграді, ани в Букаресті

Сыны д-ра Мартина, абисинского посла в Лондоні приїхали до Адис-Абебы и яко войсковы летчики вызвали двоих сынов Мусолиниого, котры также сут летчиками до прийнятя медже нима боя.

Вашингтон: Число безработных в Сполученых Державах Полн. Америки поменьшало ся в послідном року о 900.000 людей и выносит тепер 9,460.000.

В Калифорнии недалеко Льюс Ангельос выбухнул великий пожар ліса. Помимо прибытя огневой сторожи в числі перешло 2.000 людей, спалило ся килькасот домов на побережі морском. Около 250 людей попарило ся сильно в часі спасательной акции.

Чикаго: Стратосферычный бальон „Експлорер“ осягнул небывалу высоту 22.570 метров и побил новый стратосферычный рекорд. На той высоті выносит температура 60 градусов Ц. мороза.

Голендерске правительство спротивило ся признаню Совітов „de iure“, ухваленому через парламент голендерский, але заявило, же не має нич против дальшому розвитку приватных торговельных отношень медже Голандиом и Совітами.

Берлин: Правительство німецке оголосило заказ вывоза омасты, ідального олію, картофель, суровых материялов для промысла ткацкого, желізного, металового, каучукового, а также скор и других олієв. Зарядженє того не обнимат лем угля и міді, што до котрых єст уж давно введена контроля вывоза.

Ковно: Литовскы газеты доносят, же на загальне число 2 1/2 милиона жителей має Литва 60 тысяч сухотников и 14 тысяч хворых умственно.

Шангхай: Японскы газеты доносят, же кытайский амбасадор в Москві приготавлият договор с Совітами в цілі ослабленя японских впливов на Далеком всході. В том договорі предвиджує ся также уклад военный. До Шангхая прибила японска канонерка, што встрітило ся с протестом цілого

правительства кытайского. В місті устрою-ют противяпонскы розрухы.

Льондон: Италия выслала протест до всіх держав, членов Лиги Народов, котры рішили примінити санкции. Протест заповідат остры репресии господарчи со стороны Италии против тым державам. Италия має выповісти всі торговельны трактаты с тима державами.

Каиро. Англия сконцентрировала в Египті воздушну флоту, числячу 2100 бомбовых и ловецких самолетов.

На Сахалині лавина сніжна засыпала в одном місті кильканадцет домов. Понад 200 людей было засыпаних. До тепер выдobyто 40 трупов.

Вісти с краю.

Варшава: Комисия меджеминистерияльна, зложена с 10 особ, обїзджат цілу Польшу и познакомлят ся с господарчими потребами поодынокых частей Польши.

Варшава: Амбасадор німецкий в Варшаві фон Мольтке выїхал автомобилем в окрестность Варшавы и потолк ся в послідстві дефекта мотора. Стан его здоровля добрый.

Варшава: Дня 9.XI. вечером появил ся над Варшавом метеор незвычайной величины. Блеском своим перевышал 200—300 раз найяснійши звїзды неба. Явленє тото тревало около 2 секунд.

Зимушны фєрии в школах: В том року перерва зимушна в науці школьной буде тревати от 23. грудня 1935 до 9. сїчня 1936 включно.

Варшава: Як доносят с Варшавы, новый державный бюджет, котрый согласно с конституциом будз предложеный Сеймови с концом листопада, буде совсем зровноважений. Надїют ся осягнути аж и малу надвыжку доходов над расходами.

Варшава: Майор Карпинский, котрый выбрал ся на прогулку самолетом до Австралии, перервал свой лет, бо при старті в Прахавб вывернул ся самолет и поламал. Сам Карпинский был легко раненый. Перелетіл он 9.500 км. а мал перелетіти ище 5000 км. Тепер вертат он кораблем до краю.

Новый Санч: В ночи на 14 т. м. вломали ся до Кредытного Кооператыва Роботного в Новом Санчі злодіи и забрали 14 тысяч зл.

Варшава: Дня 11. листопада в православной часовні гарнизона варшавского при ул. Ратушовой 6. отслужено перед полуднем богослуженє в языку польском.

Єст то перший в истории православной церкви случай отслуженя православного богослуженя не в языку церковно-славянском, а в польском. Ужито язык старо-польский с часов ксєндза Вуйцика.

Тото богослуженє отслужил начальный православный капелян В. П. Семан Федеронько, котрый єст инициатором заступленя церковнославянского языка в литургии православной в Польщі языком польским. Ему асыстовало трох правосл. священников, капелянов войсковых Д. О. К. І. Хор співал также по польскы. На богослуженю присутствовали представителі Мин. Віроисповіданя и начальник Бюра віроисповідань некаатолицких Минист. Войны плк. Кравчик.

Варшава: Министерство Финансов доносит, же от дня 18. листопада т. р. не будут впускати до Польши нияких товаров, походячих с Италии.

Осторожно с ошустами: В Закопаном зголосил ся до Осифа Паляча якийси ошуст, котрый представил ся, же єст агентом банковым, продал Палячови облигации инвестиційной пожичкы, забрал от него 178 зл. и утек. Облигации мали прити почтом. Коли Паляч нич не доставал, дал знати полиции и оказалось ся, же Паляч пал жертвом ошуста. Таки ошусты ходят и по селах и прото треба быти осторожным.

КТО ХОЧЕ ЗАБЕЗПЕЧИТИ СЯ
НА СТАРОСТЬ, АБО ЗЛОЖИТИ ДІТЯМ
ПРИДАНЕ, НАЙ

заасекурує ся
в Асек. Товаристві
Вита и Краковске
во ЛЬВОВІ

В ЗИМІ ОТБУДЕ СЯ В КРЫНИЦІ СЕЛІ
курс ткацкий

Оплата за науку на курсі выносит 2 зл. Участники курсу не достають помещеня и удержаня. Курсанты мусят пригото-вити льняну, або волняну пряджу. Мусят они обовязати ся перестерігати рыгор школьный. Зголошеня приймає администрация газеты Лемко в Крыниці.

Важне для читалень и аматорских кружков!

В КРЫНИЦІ-СЕЛІ ОТБУДЕ СЯ ДВО-МІСЯЧНЫЙ

КУРС ДЫРЫГЕНТОВ ХОРОВ.

Курс начне ся 1. грудня т. р. и обийме теорию и прак-тику потребну до веденя аматорских хоров. Буде учити ся также церковного співу.

Оплата за науку на курсі выносит 20 злотых. Курсанты с инших сел достанут помещенє, без удержаня. Удержанє мусит покрити сам курсант.

Кромі того устроює ся в том самом часі также
ВЫСШИЙ КУРС
для тых, котры уж в прошлом року окончили курс низший. Оплата за курс высший выносит 25 злотых.

Зголошеня приймає
г-н Александер Ропицкий в Крыниці Здроу
вила „Юранд“